



16 APR, 2024

Enegem urus dagangan tenaga hijau rentas sempadan

Kosmo, Malaysia



Page 1 of 2

+ Enegem urus dagangan tenaga hijau rentas sempadan

PETALING JAYA – Kerajaan bersetuju menubuhkan Energy Exchange Malaysia (Enegem) bertujuan untuk melaksanakan perdagangan bekalan elektrik hijau rentas sempadan ke negara jiran, selaras dengan aspirasi ke arah peralihan tenaga negara.

Kementerian Peralihan Tenaga dan Transformasi Air (Petra) berkata, urusan perdagangan tenaga menerusi platform Enegem akan dilaksanakan berpandukan kepada panduan untuk jualan elektrik rentas sempadan terkini yang dikeluarkan oleh Suruhanjaya Tenaga.

Petra turut mempelawa pihak yang berminat dan berkelayakan untuk menyertai proses bidaan pembelian bekalan elektrik hijau

daripada sistem bekalan elektrik Malaysia untuk disalurkan ke sistem bekalan elektrik Singapura menerusi platform Enegem.

“Pembidaan bagi perdagangan bekalan elektrik hijau merentas sempadan ke Singapura ini akan dimulakan dengan pelaksanaan projek rintis berjumlah 100 megawatt (MW) menggunakan rangkaian infrastruktur sambung tara sedia ada antara Semenanjung Malaysia dan Singapura,” katanya dalam satu kenyataan semalam.

Menurut Petra, skim perintis berkenaan terbuka kepada Pembida Tenaga Boleh Baharu (TBB) yang mempunyai lesen penjaan dan/atau lesen peruncitan bekalan elektrik untuk pasaran Singapura dan pihak berminat

perlu berdaftar dengan *Single Buyer* untuk menyertai proses bidaan.

Jelasnya, pembida TBB yang memohon akan dinilai menerusi proses prakelayakan dan mereka yang berjaya akan mendapat notifikasi untuk melakukan bidaan pembelian Bekalan Elektrik Hijau pada hari bidaan.

“Pembida yang berjaya akan menandatangani Perjanjian Pembekalan Elektrik Tenaga Boleh Baharu dengan *Single Buyer* untuk urus niaga bekalan elektrik hijau yang telah berjaya dibida.

“Pembida berminat boleh mendaftarkan hasrat penyertaan melalui laman sesawang Petra atau *Single Buyer* bermula hari ini,” katanya.



PETRA mempelawa pembida untuk memasuki bidaan bagi dagangan merentas sempadan ke Singapura.